



kat.komp.

15698

I

Mag. St. Dr.

P

Supremus Regni Cancellarius


Pastoribus Joachimibus. Illmo et Remo S. D.
Andreas Comitis de Lemo. Episcopo Culmen-
si - gratulatur.

Elbingae Typis Achacii Correllii. 1650.

PANEG. et VITAE

Polon.

Nº. 445.



ILLUSTRISSIMO & REVE-
RENDISSIMO DOMINO
DOMINO

ANDREÆ
COMITI DE LESNO
D. G. EPISCOPO CULMENSIS
& POMESANIÆ

Post gestum multis annis

FIDE PRÆCLARA
VICECANCELLARIATVM
NUNC

AUGUSTO REGIS IUDICIO AUSPICIOQ;
MAGNO MERITORUM SUORUM HONESTAMENTO
ORDINUM OMNIUM APPLAUSU OPTATISSIMO
SUPREMUM REGNI CANCELLARIATUM

Capeffenti

NOVUM ISTUD HONORIS MAGMENTUM
animo deditissimo

*Et hoc indice animi Sermone
gratulatur*

JOACHIMUS PASTORIUS.

ELBINGÆ

Typis ACHATII CORELLII. ANNO 1650.

ILLUSTRISIMO
REVERENDO DOMINO
DOMINO
AN
COMITATU
D. G. THOMAS
D. G. THOMAS

BIBLIOTHECA



JAGELLONICA

15698I



Uctæ non ita pridem Dignitatis Tuæ nuncius, Illustrissime & Reverendissime Domine, in eo me rerum articulo deprehendit, ut & nefas omninò sit mihi tacere, & loqui minimè expeditum. Qvippe uti silentio meo officii neglecti damnosam labem, ita malè vel incautè composito sermoni, haud modicum famæ prostitutæ, invidiæve subeundę periculum sentio imminere. Tam illustri jampridem loco Tua Te & virtus & fortuna posuit, ut nihil eorum, quæ à Te vel circa Te geruntur, latere possit. Inprimis verò tam magnifica est, quæ jam Tibi contingit, honoris accessio, ut eorum, qui qualem cunq; ingenii vel styli sui curam publico debent, nec conscientiam effugere possit, nec debeat industriam. At nunc iis rebus, quæ circa nuperum sceptri & simul felicitatis

Polonæ interstitium deliquiumve apud
nos accidere, adeò intentus ago, ut nullo
novi negotii intercurſu, nullâ etiam re-
rum mearum, fortunarumve cum Lare,
migrantium mutatione, ſinam me inde di-
moveri. Et iſtic quidem inter alios Tibi
quoq; vacare me deprehendo, illa ſcili-
cet tradere poſteritati parans, quibus ge-
rendis, aut certè componendis operam,
conſilium, autoritatem Tuam ut Senator
primarius, ut amantiffimus Patriæ civis
perpetuò commodasti. Quò pronior
quoq; veniam dabis, ſi ego, qui in hoc fe-
licitatis Tuæ magmento, nulli equidem
clientum Tuorum gaudii magnitudine
ceſſerim, eam nunc non ſat prolixo vel
ſplendido verborum apparatu, ſed com-
pendio potius, & velut feſtinante ad inter-
ruptam operam impetu effudero. Mo-
roſa quoq; aliorum iudicia, quæ in deli-
cato literatiſſimè, at non minus tamen
ſcriben-

scribentibus lubricæ aulæ theatro vix for-
san effugiam, facilius, opinor, propitiabo;
ubi benignitati Tuæ utcunq; satisfecero,
Qvod felix ergò faustumq; sit, supremi jam
Cancellarii munus suscipis Illustrissime
LESCINI. Munus prælustre, & actionū gra-
vitate officiorumq; necessitudine proxi-
mum Regio. Unde in Imperio Germanico,
qvod si minus vim, imitamenta tamen ha-
bet Romanæ Majestatis, primæ ab Impe-
ratore sedes sunt Cancellariis. Sic apud
alios haud obefæ naris populos ita Regi-
bus Cancellarii assident, ut ab iis nullo in-
termedio, nisi Regii forsan sanguinis prin-
cipe, disparentur. In septentrione parte Or-
bis rigidiore & ad Togæ humanitatem
tardiùs mansuefactâ, præhabiti quidem ali-
cubi sunt alii magistratûs, bellis utpote ge-
rendis, arcendisve injuriis, in quas semper
ille pronior fuit, nervo deniq; rerum col-
ligendo magis visi necessarii, Atq; etiam

post depulsam cultu humanitatis ferociam
quædam gentium istarum ita moris præsci
retinentes sunt, ut in Ordine Senatorio lo-
cum minimè inter primos dent Cancellariis.
Cæterum tamen hi quocunq; gradu
positi, si vera interioris potentie momen-
ta, si latè per Regiam Regnumq; patentis
autoritatis pondus potius, quàm loci or-
dinisq; inania spectes, supra omnes quo-
dammodo dignitates ubiq; ferè eminent.
Ac sanè, pace dixerim aliorum magistra-
tuum, quibus ego multum honorem de-
beo, & nec velim unquã, nec possim quic-
quam detrahare, si præcipua omnis re-
gnandi vis in jure populis dicundo, in con-
siliis dandis poscendisq;, in fæderibus pan-
gendis, in custodiâ legum monumentorumq;
Regni, in dispensatione beneficiorum,
in censurâ criminum consistit, nulli
ferè magistratûs in rerum tantarum admi-
nistratione plus principibus conferunt
Can-

Cancellariis. Mente reguntur libranturq;
magna imperia: at mentem principum
sciunt enunciantq;, sæpè & instruunt Can-
cellarii. Fata fortunamq; populis divide-
re principes solent, sed profectò per Can-
cellarios. Amicitias privatę res, fœdera
publicę pro munimentis habent: at fœde-
rum administri plerumq; Cancellarii sunt,
& hi responsa dare solent legatis extero-
rum. Habent dominationes omnes arca-
na sua, quibus innituntur: at hæc fanè vix
alibi quàm penes Cancellarios deponun-
tur. Deniq; imperiorum omnium dispen-
satrix & Regina Justitia est: at hujus anti-
stites interpretesq; Cancellarii sunt. Cum
toties rea coram illis stet innocentia, cum
imbelles adversus vim potentium sæpis-
sime legum auxilia invocent, cum ab Vrba-
nis subselliis ad Aulę tribunal magno nu-
mero confugiant læsi oppressive. Quid
multa? promptuarium Consilii publici, At-
las

las negotiorum, afflictorum inopumq;
asylum, Cor, oculus, os deniq; Principis
Cancellarius esse meritò gloriari possit.
Unde porrò facile conjectu est, quantę in-
genii dotes ad tantum munus requirantur;
& quantas cervices esse oporteat, quæ
huic tanto oneri ferendo esse debeant.
Nam primùm quantę pietatis eum esse de-
cet, cui tantarum rerum cura, cui tam in-
gens Egregii publici moles imponenda
est? Quis enim sustinendo huic cœlo erit,
nisi Superis amicissimus? & animi propin-
quitate quàm maximè innexus? Quis vi-
carię DEI potestati in tam grandi functio-
ne dignè subserviet, nisi DEUM habeat pro-
pitium? Non frustra sanè olim in hâc Re-
publ. selecti semper ad hanc provinciam
viri sunt, qui amplissimis sacerdotiis præ-
diti, morum sanctimoniam cum rerum
agendarum dexteritate conjunxissent:
adeò ut ordinis Ecclesiastici semper Can-
cella-

cellarii essent. Postea cum amplissimi hujus muneris curas inter duos dividi placuisset; id à Sigismundo Primo repertum, temperamentum est, ut si quis Regni civium sacris non initiatus Sigilli custodiam accepisset, collegam tamen is semper ex ordine sacro haberet, Vt ne unquam, scilicet ingens illa Regni statio ita curis seculi indormisceret, quin esset semper, unde pietatis admoneretur. Vnde Odrovanscorum, Ociesiorum, Padnieviorum, Miscoviorum, Tiliciorum, Gembiciorum, Zadsiciorum, Lubiniorum & similium in Poloniâ effloruit seges: qui omnes non minus Religionis Pietatisq; curâ, quàm rerum in summo munere gestarum amplitudine enituêre. Quantâ porro prudentiâ opus est Cancellario? quem, ut diximus, penu quasi quoddam Consiliorum, esse decet? cui sæpè cum Principe suo in turbido tenenda sunt rerum gubernacula;

la; cui ad nullam inopinam negotiorum
vel discriminum faciem exhorrescendum
est. Quem Priniips ingenium pernosce & ita
scitè flectere posse cōvenit, ne vel abruptâ
contumaciâ, vel deformi obsequio illud in-
noxia aut devia consilia deducat vel peri-
clitari in illis sinat. Qvi & foro & aurâ popu-
lari ad publicam utilitatem uti nôrit: qvi
Comitiorum undas, qvi Tribunitios spiri-
tus temperare ac demulcere qveat. Qui &
exterorum ingeniis, variis sanè & non unâ
arte tractandis mores, sermones & lauda-
tas illas hominibus Politicis comis pruden-
tiæ compedes aptare calleat. Quam ad
rem instructum esse â primis ungviculis
oportet iis doctrine præfidiis, quæ ad
magnæ fortunæ cultum requiruntur. O-
pus est literarum peritiâ, non umbraticâ,
spatiis Academiæ includendâ; sed so-
lidâ illâ & citra inanum argutiarum spinas
amœnissimos utilis sapientiæ fructus omni
vitæ

vitæ colori præbente. Opus est inprimis
Eloquentiâ, non morosâ illâ & ungues ar-
rodente, sed fluidâ, facili, nervosâ tamen,
quæq; pro diversitate rerum & leniter
ducere, & quo velit flectere, concitare de-
niq; cum opus est, orationis suę jugales
possit. Opus est historiarum cognitione,
ut ante se gesta in usum suum vertere, ut
causas & eventa consiliorum, actionum,
bellorum, ut rerumpubl. fata & periodos
nôrit, ut egregiorum hominum facta sibi
ad imitandum proponere; ut deniq; alben-
tes aliorum ossibus scopulos evitare sciat.
Opus deniq; est, quę utramq; in vitâ ci-
vili paginam facit, & sine quâ mancus est
omnis Eruditionis apparatus, Experien-
tiâ. Crudum est, quicquid habueris inge-
nii dotium, nisi illa percoxerit. Infirmâ
luce nitet, si quid ab usu non exsplenduit.
Summum negotiorum corticem inspicit,
non negotia, qui ipse in negotiis non ver-

fatur. Vt eminus aliquid intuentibus sæpè
illudit error oculorum; ita ut propiùs fug-
gressi alia omnia reperiant, quàm ante
crediderant: ita in ipsis rerum civilium
penetralibus alii colores, alii vultus ne-
gotiorum se offerunt, quàm prima frons
promiserat ostenderatve. Neq; ullustam
illustris Phœbus ita viarum discrimina
præmonstrare omnia potest, quin sæpis-
simè hîc aberrent novi Phaëtontes. Sunt
tam varii istic anfractûs, tam multi sinûs,
ut nec cogitare omnes, multò minus
ostendere, minimè certe assequi nisi mul-
ta tentando explorandoq; queas. Vna
Ariadne hîc est Experientia. Res tanto
magis ardua, quod vix quoq; in potestate
nostrâ est. A tempore magnam partem
dependet; quod dare nobis non possu-
mus, apprehendere possumus cum datur.
Neq; enim omnibus etiam contingit in-
occasiones & articulos rerum magna-
rum

rum incidere. Rarissimis hoc solidioris prudentię gymnasium fortuna benignior aperit; sæpè & serò nimis aperit, cumq; usus jam non est ejus, quod discendum offertur. Quò majoris faciendi sunt, quos diu in ludo isto theatroq; fortuna exercuit: qui sortem utramq; experti, bonis malisq; suis, publico præcisse, & vel per errores non errare didicere. Magna sunt ista, quę in Cancellario jure refulgere dixi: sed minimè profectò illum consummabunt, nisi alia insuper animi decora accesserint. In primis Generositas, illa rerum magnarum capax, illa torpori inimica, illa agilitate naturæ coelestium imitans indefessam agendi alacritatem. Illa fraudum expers, timoris ignara, invidere nescia. Illa verum, ubi publica res poscit, vel cum periculo suo dicere non abnuens. Libertate offendere quàm servitio placere promptior. Non odia provocans cru-

do rigore, sed nec vili assentatione refu-
giens. Dotes bonorum non malignè ob-
tegens, sed remunerare cupida, neq; meri-
ta aliis ex gratiâ affingere, aliis ex odio de-
trahere sustinens. Vni æqua Virtuti, &
vel nudam, nec quod rependat haben-
tem, æstimans Firma adversum cor-
ruptores. Opes possidens, sed quibus ne-
mo ingemiscat: potius autem plurimi
publicè privatimq; fortunam suam de-
beant. Qvippe quas illi in virtutis instru-
menta, in decentem fortunę splendorem,
in usus publicos, in egentium levamen,
in Ecclesiæ, Scholarum, Patriæ deniq; or-
namentum convertunt. Illa verò lumina
virtutum quàm decent Cancellarium?
cum DEO & conscientiæ omnia postha-
bet; cum Patrię se totum impendit, saluti
ejus intentus, sed ut & vitia, si quę publi-
cam rem excedunt, satagat emendare.
Mederi ei vel generosis pharmacis non
ne-

negligens quâ potest, & cum spes ulla
allucet boni successûs. Nam adultis &
prævalidis morbis mavult se non oppo-
nere, ne irriter malum, aut palam tan-
tum faciat laborantis patriæ nuditatem,
suasq; simul medelæ impares vires. Est
sæpe scilicet, ubi intra Regna remediis
peccatur; est, ubi qui ægram nolunt Rem-
publ., omnem perdunt. Sufficere debet
interdum cardines & fundamenta, quibus
innititur Imperii incolumitas, servasse:
si effici tutò aut sine magno motu non po-
test, quin nutet alicubi paries, quin tigna
perpluant. Egregium deniq; omni Can-
cellariorum decori fastigium Modestia
& Humanitas addunt. Eò rariùs ferè in
illis inventæ, quò difficilius est à fortunâ
suâ non corrumpi. Obsidetur quotidie il-
lorum limen ingente hominum numero;
prodeuntibus tot vel candidati vel rei sup-
plicant, aures ingenibus illorum quæren-
tes.

tes. Assurgunt ubiq; Magnates, præeunt,
comitantur, & nullus est, qvi gratiam eo-
rum non prænset, non vitare nitatur of-
fensam. Arduum est istis non percelli &
non in aliquam sui oblivionem soporari.
Subrepat vel ignorantibus Insolentiæ ve-
nenum; iis inprimis, qvi non admodum
excelsæ indolis sunt, vel magnæ felicitati
non longo satis usu insuevere. Non ca-
piunt isti fortunam suam, & angustis vel
inadsuetis animis superfluente quasi co-
piâ bonorum facile inebriantur. Unde
se semper circumspiciunt, & ignorant
semper. Aliorum necessitates alto su-
percilio tramittunt, & arrogante fastidio
respuunt preces. Aditu difficiles, & ver-
bum aliquod suum, imò & conspectum sui
magno imputantes. At quos altæ fortu-
næ pares ingenita Nobilitas & Virtus fecit,
Aquilarum instar, felicitatis honorumq;
quasi domesticum & nativum sibi jubar
in-

inconnivis oculis ferunt. Fastigii sibi sui
conscii attolli se putant, ubi se demit-
tunt. Hoc svavisimum magnitudinis suæ
delectamentum habent, cum infra se po-
sita respiciunt. Quæ prona ipsis & quasi
substrata clementem eorum intuitum pro
beneficio habent. Beata verò sunt, aut
esse se putant, si molliter à magnis istis au-
diantur. Illi autem lubricitatis humanæ
& suæ simul imbecillitatis ex tam variâ
supplicantium sorte admonentur. Et vel
maximâ fortunâ suâ majores se ostendunt,
dum ejus sibi modum intra animum po-
nunt. Eâ deniq; tum se uti rectissimè pu-
tant, quando cum quamplurimis, si fieri
potest, faciunt communem. Bono publi-
co se natos rati, & dum uberrimo Regalis
munificentiae fonti proximi asident,
quàm copiosissimos inde ad sublevandam
indigentiam humanam beneficiorum ri-
vulos educunt. Tristem verò neminem.

C

à se

à se abire patiuntur, nisi fortè non meren-
tem gaudere. Ejus altitudinis naturam,
æmulantur, quæ extra nubes posita per-
petuâ nitet serenitate. Et vim genio suo
facere videntur, si quando fulminare
oportet. Neq; profectò fulminant, nisi è
nube, quam ipsa terrarum facinora, & spis-
sæ negotiorum fuligines animo vultuiq;
eorum inducunt. Oppressos à potentio-
ribus vindicant, ferras amputant litium,
nodos resolvunt. Quos Mars aut fortuna,
dum de Patriâ benè merentur, male ha-
buit, erigunt juvantq;, virtutem in his re-
munerando in aliis excitantes. Neq; Mu-
sarum commercium averfantur, triste
grandium curarum tædium castissimâ ea-
rum consuetudine subinde abstergentes,
Plerumq; etiam inde hauriunt nonnihil,
quo seculo serviant suo, futuris commen-
dentur. Posteris quippe suis sibi olim su-
perstitibus interesse laborant, & angusti ta-
libus

libus videntur ævi sui limites. *Æternitati*
ipſi imminent, avidi decoris, qvod mori
neſcium morti eripit dignos non mori. Ad-
umbravi qvalicunq; industriâ Cancellar-
ium, & dotes expreſſi, qvibus ille exi-
mium ac memorabilem ſe reddere poſſit.
Iſtiusmodi autē miniſter decebit ſanè Ma-
gnum Principem, ſi talem repperit, ſi non
repperit, ſidenter dicam, faciet. Incredibi-
le enim dictu eſt, quantum lucis, quan-
tum roboris Regi Regnoq; talis viri virtu-
tes afferre poſſint. Certè cum in maxi-
morum Principum memorias regredi-
mur, deprehendimus luculentisſimè, Al-
phonſo Arragoni Panormitanos, Carolo
Qvinto Schlikios, Seldiosq; Gallis Regi-
bus Bellevrios, Hispanis Ximenas & Con-
ſalvos; in hâc verò Republ. Sigismundo
primo Schidlovecios, Auguſto Radſivil-
lios, Stephano & Sigismundo Tertio Za-
moſcios, in Sveciâ Guldenſternios, recen-

tissimo deniq; sed præsigni exemplo Oxen-
sternios Regibus suis ad laudem, atq; illud,
in quo positi fuere, potentiæ fastigium
plurimum profuisse. Nam profectò quan-
tūcunq; magnitudinis sit animus Principis,
sufficere non potest curis, quæ Orbem
terrarum vel amplam ejus partem debet
complecti. Supra homines positi homi-
nes esse non desinunt. Fatiscerent sub
mole, nisi Atlantibus illis Alcidæ, Alcidis
Thesei sui subvenirent. Vix certè reperi-
ri potest, qui unus idemq; cunctis animi
virtutibus æquè præstet; quiq; in omni-
bus Regni muniis, quæ uti varia numero
sunt, ita totum hominem propè singula
desiderant, perinde excellat. Ignem ali-
quis vi ingenii enituit, opus habet, qui
temperet demulceatq; fervorem. Mar-
tium spiritum gerit, Palladio eget mode-
ramento. Rarò reperitur, qui perinde con-
silio, atq; impetu illo, quo ad consilia exe-
qvenda

qvenda opus est, valeat. Eget igitur viro,
qvicum caput conferat, & qvid factu opus
sit, deliberet. Res maximas Eloqventiâ
inter homines effici certum est; & adhuc
sepenumero verum experiuntur Princi-
pes, quod prudens olim & multa sago to-
gâq; expertus Epirotarum Princeps Pyr-
rhus olim dicere non erubuit: plurimum
se urbium imperium per Eloqventiam
Cynexæ, qvàm armis suis adeptum. In-
terest igitur Principis; ut habeat, qvi ani-
mos mortalium trahere, oratione devin-
cire, erigere, stimulare, dejicere, in
omnem deniq; partem flectere idoneus
sit. Sed qvorsum ego gravitatem ampli-
tudinemq; muneris, qvorsum necesstita-
tem Tibi tam operosè edissero; qvi opti-
mè omnium, qvicqvid hujus est, experien-
do didicisti. Neq; enim rudem aut inex-
ploratam manum ad hunc clavum ad-
moves. Iampridem cum versas tractasq;

magno omnium cum applausu. Jampri-
dem vocis Tuæ oraculo utitur Regia Ma-
jestas. Jampriem consilia Tua, & acerrimam
pro publicâ Libertate mentem Res-
publica experitur. Jampriem ore Tuo
loquens Iustitia de fortunis meritisq; ho-
minum pronunciat. Nihil accedit jam Ti-
bi, quàm quod collegam antè habuisti, cui
potestate par, ordine secundus eras; nunc
collegam accipis, quo, quantumvis & ipso
inter Patriæ Summates magnificè eminent-
te, prior eris. Nemo jam muneris Tui fasti-
gium inumbrare vel volet vel poterit. Pri-
mum apicem tenes, & deinceps non quàm
Antistes tantum, sed & quàm Cancellarius
anteceDES consortem. Dicerem ipsum
etiam Decessorem Tuum, virum sanè
Magnum, sed inter contraria Civium
studia, judiciaq; sequiora ad vitæ usq;
finem plurimum conflictatum, gratiam
Tibi apud plerosq; imò & gloriam auctu-
rum.:

rum: certè plurimis haud paulò acceptius fore lumen lampadis istius, postquam ex illâ utut toto orbe clarissimâ manu in Tuam devenit. Sed minimè Tu habes opus, ut â cōparatione famam, vel ab offensis alienis qværas favorem. Tuis opibus & proprio cēsu dives, sufficis Tibi ad Te omnibus commendandū. Haud enim est qvod in Te meritò vel morosissimi rerum æstimatores jure possint desiderare. Certè qvicquid ante â Cancellario postulari diximus, abunde Te non implere tantum, sed antevenire posse jampridem ostendisti. Et sunt in Te multa, qvæ Cancellarium delineans oratio nostra non attigit. Vt adeò ex Te potius Cancellarii Idea, quam ex imparis penicilli nostri adumbratione petenda sit. Natalium certè splendorem in eo, qvi tam grandi munere dignus videri debeat, requiri, haud est dissimulandum. Neq; enim facilè, nec citò utilem Regi vel Regno

gno operam navare poterit, qui velut è
terrâ demum enitens, longo tempore &
rarâ qvâdam virtute opus habet, ut se eò
provehat, in qvo cæteros fors nascendi
posuit. Qvi compendio qvasi autorita-
tem, rem magnis muneribus pernecessa-
riam adseqvuntur, qvam obscuri illi vix
diuturnis laboribus sibi comparant, invi-
diam & contemptum ægerrimè eluctati,
& nebularum istarum aliquid ipsis etiam.
Principibus suis plerumq; affundentes.
Sed & impotentiùs ferè tales fortunæ am-
plitudinem ferunt, & præstringuntur faci-
lè luce, qvæ ipsis non est nativa. Qva-
propter rectè his præferuntur alii, qui è
sangvine virtutum seminibus jamdudum
imbuto nati, atq; inter domestica laudum
exempla enutriti stimulos inde ad imi-
tandum accipiunt, & gloriæ majorum
propria decora non adjicere ducunt sibi
pudori. Gentis autem splendore tali,
qvos

qvos Tibi, Illustrissime Cancellarie, postha-
beam, haud difficulter eqvidem reppere-
rim, qvos anteponam, minimè invenio.
Sunt, fateor, in hoc Regno omnes, qvot-
qvot insignia nobilitatis possident, æqua-
les, hoc est aditum & jus habent ad qvæ-
vis Regni beneficia & ad qvosvis vel cel-
sissimos honores. Attamen discrimen fa-
miliarum res ipsa facit: & sunt multæ do-
mus, qvas continui fasces purpureq; insi-
gniunt; sunt aliæ, qvæ cum fumis tene-
brisq; suis perpetim colluctantur. Tua
domus multis jam seculis inter Senatorias
est, & dicere audacter ausim, inter primas
Senatoriarum. Illata in hoc Regnum
cum primâ Religionis Christianæ face:
hincq; adeò natales suos in Poloniâ pari
ærâ cum sanctissimæ fidei incunabulis
computat. Etenim cum olim anno post
natum Servatorem millesimo sexagesimo
quinto, Dambrovca Ducis Bohemorum

D

filia

filia ad Miecislai Polonorum Principis
thalamum cum nuptialibus tædis Divinę
lucis lampadem deportaret, huc comita-
tus illam est nobilis Perstinius, vestrę gen-
tis in Poloniâ autor & origo. Cujus alter
filius Bozuta principem in Poloniâ Ponti-
ficatum Gnesnensem adeptus est. Alter
militari gloriâ clarus filios nepotesq; ha-
buit, quorum alii in Christi militiâ nomen
professi summis pariter Infulis; alii virtu-
te civili bellicâve inter Palatinos Castella-
nosq; enituêre. E quibus, Jagellonis ævo,
Dobeslaus Hermannum Marianæ apud
Livonas militiæ magistrum ad Golubiam
magnâ in omnem posteritatem virtutis fa-
mâ fudit profligavitq;. Propagatum ita
familiæ decus est ad Raphaëlem usq; Le-
scinium, (huic enim primo hæsit id no-
men, cum cæteri pro facultatibus, quas
tenerent, vocabulum hætenus varias-
sent) qui â Friderico tertio hujus nomi-
nis

nis Imperatore inter primę admissionis familiares adscitus & Comitatus insuper dignitate honoratus est. Sed idem in Patriâ Aulę magisterio à Casimiro Rege prepositus, Castelli simul Posnaniensis curam unâ cum Generali Majoris Polonię præfecturâ & duodecim aliis minoribus, inusitato planè exemplo, obtenuit. Crevère numero posteri, virtutis pariter honorumq; cursu nihil à Majorum orbitâ deflectentes. Quos si omnes recensere vellem, laboraret certè copiâ rerum oratio. Ne postremos quidem Arboris Lescinianę ramos attrectare audeo, quod & multi sunt, & in quâ numerosissimos se furculos diffudere, ut vel enumerare singulos longi temporis res sit: & nunc festinanti melius videatur honore omnes silentio venerari, quâ perfunctoriâ & rerum dignitati multum detraturâ oratione delibare. Ne illustrissimum quidem Paren-

tem Tuum in campum hunc producere sustineo, intra breves paucarum linearum angustias cludere ac velut strangulare veritus, quæ ille foris bello Livonico sub Sigismundi III. auspiciis, & postea domi, in hac ipsâ, quam nunc dignissimus successor filius capessis, statione gessit: omnia adhuc pulcherrimè virentia in animis hominum, & curâ fastorum meritò olim æternitati temporum consecranda. Id ad extremum attigisse nunc sufficiat, hoc nostro etiam tempore præcellam Corylum vestram inter Principes Poloniæ stirpes eminere: certè haud ullam nunc extare arborem, quæ tot ex se Capita uno eodemque tempore summo Senatui inferuerit. Etenim præter Te quinque minimum ei Ordini adscripti sunt: quorum unus VARMIENSI Pontificatui miris omnium studiis florentissimus PRINCEPS præest; cæteri aut Palatini, aut Castellani,

ni, aut summo Ærario præfecti, ingenio,
facundiâ, gratiâ, autoritate pares pau-
cos in Regno, neminem habent superio-
rem. Sed propero ad alia quæ magis
Tua sunt. Quibus parere Tibi ingens
Nobilitatis decus poteras, nisi à Majori-
bus partum accepisses. Tanto jam niti-
dius splendens, quòd ab illis sparsum in
Te, vicissim verò à Te in illos refusum,
quâdam quasi luctâ & percussu exar-
descit magis. Tu enim à tantis Progeni-
toribus oriundus minimè eorum famæ
incubandum Tibi putasti; ut plurimi so-
lent, quibus satis est Imagines multas,

— & stantes in curribus Æmilianos
ostendere posse. Sed nempè à primâ ju-
ventâ præclari Patris exemplum ductumq;
secutus ad Bonæ Mentis templum & ad
laudatissima Pallados sacra contendisti.
Ubi iis artibus docilem & omnium capa-
cem indolem imbuisti, quibus ad Sapien-

tiæ arcem itur, & ad Honoris Gloriæq; sacrarium. Placuit autem vulgares seculi curas adspernanti, illum ingredi tramitem, qvi piorum vestigiis, multoq; Martyrum sanguine signatus ad bellum ducit, sed sanctum, neq; hominibus, sed vitiis & improbitati metuendum. Qvippe DEO Te consecrasti, pietati spes & vota omnia Tua submisisti; Ecclesiæ Te gubernaculis parans, quæ generosis sanè peccatoribus, & non piis tantum sed robustis manibus indigent, ut illam in seculi syrtibus ruentem pietatis navem retineant ferventq;. Gradibus autem & velut per stipendia emerita ad prima sacræ hujus militiæ decora trabeasq; perrexisti. Prope-
rus, sed ordinato progressu. Primùm enim sacram Pueritiæ prætextam cum CANONICATÛS Cracoviensis Togâ commutasti. Mox ABBATIS nomen accersit, quod ætatem moribus pulcherrimè
præ-

prægressus Adolescens egregiæ sanctimo-
niæ exemplo implēsti. Cum ad Aulam
animi firmitas maturuerat, Reginæ nomi-
natus es Cancellarius; evidente augurio
præludioq; ejus dignitatis, quam postea
adeptus es, & nunc fastigio suo exagger-
ratam tenes. Neq; enim diu intra illa
honorum vestibula subsistere Te passa est
Virtus Tua & virtuti respondens favor
Regius. Secutæ mox Infulæ sunt, CAME-
NECENSIS primùm, sed quæ paulò post
CULMENSIS cecidit. Adjuncta est SIGILLI
minoris cura, quam pluribus annis lauda-
bili animi Magnitudine, vigilantia fideq;
mirificâ gessisti. Procancellarius, sed si-
mul perpetuò fidus Patriæ Civis. Civis,
sed non minus prudens Senator. Non
ignorasti callidas Regnandi artes, sed sci-
re quàm usurpare maluisti. Satis Tibi
ingenii, fatis caloris fuit ad novas confi-
liorum fabricas, sed antiqua prætulisti,
quibus

quibus procesſiſſe in hunc florem, atq; in
hoc robur adoleviſſe Rempubl. animad-
vertis. Haud neſcius vitia quoq; lapſu
temporum & felicitatis quâdam luxurie
ſucceviſſe: ſed ea circumputanda leni-
ter, non unâ cum membris reſcindenda
cenſuiſti. Regi fidus & ingenuâ liberta-
te probatus Conſiliarius. Rempublicam
privatis ſemper ſtimulationibus præha-
bens, ſaluti ejus invigilans, & ſi opus eſſet,
ſanguinem impenſurus. Quod vel nuper
patuit, cum quâſſam & inter decumanos
fluctûs periclitantem Regni ratem conſi-
liis prudentiſſimis juviſti: male conſulto-
rum liber caſtigatorem, eorum quę corrigi
poſſent, ſalubris corrector; quę ſpem
emendationis excluſiſſent, ferenda mo-
nens, donec tempore mitigata manum
ſanatricem admittant. His meritis jam-
pridem magna Tibi per Regiam Patri-
amq; omnem veneratio ſimul & amor ad-
crevit.

crevit. Quem stimulant insuper aluntq; re-
liquę Tuę dotes. Benigna inprimis illa lætę
indolis temperies, & hilaritas frontis digni-
tati nihil auferens. Quam præter morum
gravitatem & generosi animi altitudinem
oris insuper majestas & proceri corporis
decor augustam faciunt. Accedit facun-
dia, non pigmentis aut fuco superba, sed
nativâ pulchritudine exsurgens. Verè
animi Tui index, in qvo Candor ipse se-
dem fixisse videtur. Adeò ille sui non
obtegens, adeò nescius simulationum est,
ut prudentiâ demum magistrâ didicerit
non nimiùm patere, ne artibus alienis
fieret opportunus. Interim manet adhuc
in Amicitiiis sinceritas, ingenium in fron-
te promptum ferens, & irasci quàm odis-
se, offendere quàm palpo fallere facilior.
Adest simul robustus animi vigor, haud
vacillans in iis, quę probat. Non cedis
arduis, sed insistis : urges benè cæpta,

E

donec

donec perseverantiâ vincas. Vir verè ad
magna natus, rerum vilium adspernans,
turpium ultor, omnis honesti vindex,
famę alienę non imminens, Tuę curio-
sus, æquus meritorum æstimator, justi in-
justiq; perspicax arbiter, benignus affli-
ctorum receptator, opum haud quęsitator
sollicitus, sed magnificus erogator. Tali
tantoq; Tibi cum MAGNI SIGILLI cu-
ra jam committitur, est profectò cur Rei
Christiane, cur Regi, cur Regno, cur Ti-
bi deniq; plurimùm gratulemur. Rem
Christianam juvare haud dubiè multum
voles tantus ANTISTES, poteris luculen-
tissimè tantus Cancellarius. Regi mune-
rum sacrorum Candidatos commendabis
Ingenio mites, doctrinâ prudentiâq; po-
litos, moribus integros, laborum toleran-
tes, & non lanam magis quàm salutem
ovium quęsituros. Distractos sacrorum
diversitate animos præceptæ debiteq;
Chri-

Christianis omnibus Caritatis ferrumine
committere studebis: ad placida huma-
nitatis certamina invitans omnes; mini-
mè verò in odia mutua, in injurias aut
lanienas acuens. Conscientiæ Tuæ quia
reverens es, non eris, scio, gravis alie-
næ. Bonum libertatis, quod ipse maxi-
mi facis, non feres ægrè magni pariter
ab aliis fieri. Inprimis cum hi nihil jam
aliud, quàm pacem quàm quietem inge-
minent. Sed Christianæ rei sic quoq; mul-
tum luminis & adjumenti afferes, cum
Virtutibus Christianis à Te pretium erit:
cum Justitiæ, cum Temperantiæ, cum
verè Fortitudini, cum Prudentiæ deniq;
suus constabit honos: cum præmia iis Te
auctore nemo alius præripiet. Sed &
artium bonarum patrocinium in partem
curarum Tuarum haud dubiè fines veni-
re. Illarum inprimis, quibus juvenus
non doctior tantum, sed & melior reddi-

tur; quibus non spinarum rem Christianam
hactenus suffocantium, sed optimarum
frugum, hoc est, probe & modeste
sapientiæ semina continentur. Dedisti
jam ante Tuæ in literas propensionis non
obscura specimina. Præcipuè in juven-
te olim Tuæ Rectore, quem uti genere
decoro, ita super alias eximias animi do-
tes, multâ eruditione egregium luculentis
honoribus extulisti. REGIÆ porrò MA-
JESTATI de tali Cancellario gratulamur;
quòd habebit non minùs ingenuum,
quàm prudens pectus, in quòd cu-
ras suas effundat: quòd negotiorum ar-
dua ei committet, qui cunctis Regni Or-
dinibus dilectus honoratusq; publicum
sui amorem rebus agendis gratificabitur.
Qui nullâ rerum novarum cupiditate ni-
miâ pruriens, in id, Principi suo fidus
Optio laborabit, ut ad veterem CASIMI-
RORUM, SIGISMUNDORUMQ; felicita-
tem

tem res Regis Patriæq; provehantur. Regno verò Te Cancellarium gratulamur; quod is jam præcipuus Regi minister aderis, qui Reipublicæ morbos & vulnera rectissimè omnium novisti; qui fidam nec minus scitam manum ægrè isti Matri quàm mollissimè suppones: qui gravissimis negotiis jamdudum immixtus tractare ea ex dignitate & usu Reipublicæ didicisti: qui annuis utriusq; muneris Tui proventibus contentus, non ad Te trahes publica bona; sed benè meritis, sed rectè usuris commendatione Tuâ conferes. Tibi verò tandem, Illustrissime Cancellarie, cum munus recens acceptum, tum Regem præcipuè, sub quo illud administrabis, jure meritisimo gratulamur. Jam enim verò amplissimum demum Tibi theatrum, in quo spectari, jam campus contigit patentissimus, in quo explicare se Virtutes Tuæ poterunt. Jam tempus &

occafio erit, ubi Rempublicam Tibi æternis nexibus devincire, ubi Regi luculentiffimè probare fidem dexteritatemq;, ubi feculum obligare, ubi omnem deniq; posteritatem vectigalem Tibi reddere in manu habebis. Provehet secundabitq; labores Tuos, post Deum, Virtus & felicitas Regia. Beatus es, qui in JOANNEM CASIMIRUM Regem incidisti. Is bonis malisq; rebus edoctus, Consilii, rei omnino divinæ, necessitatem compertam habet: & quamvis ipse cautâ animi prudentiâ ad sibi suisq; consulendum aptissimus, minimè tamen inimicus est consilii, quod non ipse invenerit. Is & laxam illam, Regnoq; perniciosam consultandi rationem, quâ ponderosissimæ quæq; deliberationes hætenus religione secreti, hoc est, animâ suâ destituebantur, refrænat, & quantum per Regni leges licet, coërcet. Sed imprimis bene consulta, si
qvis

29
quis unquam Regum Imperatorumve,
exequi rectè novit. Ipsemet negotiis præ-
sentia suæ auspicia præbens; ipse ingente
spiritu languidum & nuper propè concla-
matum Reipublicæ corpus replens ani-
mansq; ipse rerum gravissimarum ductor,
laborum minimè unquam fugitans, gloriæ
per honesta cupidus, contemptor peri-
culorum, quietem publicam privatâ re-
dimens, & vitam ut civium servet, suæ
prodigus. Quod vel ultimus cum rebelli
hoste congressus ostendit, ubi cum multi
propè desperarent de Republicâ, cum &
Regium animum ex suo metirentur, præ-
iit ille imperterritus, & cum ductore ca-
reret miles, ipse duxit in hostem, sui,
cui alii omnes timebant, securus. Felix
præterea, quod præfiscinè dixerim, Prin-
ceps, & ex præsentissimis naufragii discrimi-
nibus sui suorumq; prosperrimus asser-
tor. Vehat annalium favor Camillos, qui
Patriam

Patriam suam de manibus hostium extor-
serint. Ille certè haud minor Camillis,
qvi delibatum civium suorum florem, à
trecentis amplius millibus pugnacissimo-
rum hominum circumfessum & jam victûs
inopiâ marcescentem, velut Deus é ma-
chinâ, servavit: tam fortunatus scilicet
copiarum suarum, quæ vix viginti milli-
um erant, Imperator, ut & has ipsas cir-
cumsepi à multitudine hostili cæptas ex
Orci quasi faucibus eriperet: & alterum
Exercitum, non hostium tantum spe,
sed omnium propè opinione jam quasi
absorptum libertati Regnoq; restitueret.
Verè Pater Patriæ, verè immanium mon-
strorum domitor Hercules, verè morien-
tis Poloniæ refocillator. Quid jam porrò
nos tam timidos reddet; quin omnia à
tali Principe speremus, tam insperata
scilicet assecuti? Quæ tam audax fiducia,
quæ tam improba vota, quorum ille, cœ-
lum.

lum adeò propitium habens, nos non videatur damnaturus? Venerati sumus Magni Patris SIGISMUNDI Tertii cautissimam mentem; prædicavimus gravitatem moderationemq; animi. Mirabitur posteritas illud per tot adversa eluctatum, longævum illud, & deniq; filiis ipso dignis benè traditum Regimen. Stupuimus ad Magni Fratris VLADISLAI fortissimos impetus, & simul ad illam ubiq; individuam ac quoqvò is se verteret, pari passu comitantem fortunam. Ingens uterq; decessor, sed aliis ferè ille, aliis iste virtutibus admirandus. Noster Princeps Patris Fratrisq; magnitudinem complexus est; utroq; major in eo, quod illorum nullus adeò turbatam & propè pèsùm fidentem Rempublicam accepit; nullus tanto è periculo, nullus tam celeriter, nullus minore impensâ liberavit. Horret inter tanta rerum prodigia mens, & vox propè ipsa


F

hæret

hæret silentio defixa. Animus tantum in
suspiria solvitur, oculi manûsq; nostræ ad
cælum protenduntur; gratias pro tam mi-
rificis benevolentiaë divinæ pignoribus
molientes. O faveat porrò benignum Nu-
men muneribus suis, & tam bonum, tam
moderatum, tam prudentem, tam fortem
Principem publicæ rei, Principi verò vi-
tam incolumem & perpetuam felicitatem
qvàm diutissimè servet! Pergat ô acerbos
olim juventæ labores casusq; melioribus
maturæ ætatis successibus solari! Foveat
depositum suum, & hunc Regni optimi li-
beratorem inter perpetua fortunæ obse-
quia, inter blanda civium in ipso colendo
certamina, inter gratantia amicorum Prin-
cipum studia, malevolentium dolores,
terrentium metus, devictorum supplicia;
hincq; porrò inter pacis gaudia, inter læ-
tissima domûs suæ incrementa & traduces
Regiæ Virtutis ex fæcundo REGINÆ gre-
mio

22
mio furculos, ad feram & laboribus suis
svavisimè fruituram deducat senectam.
Idem Te quoq; Illustrissime Reverendis-
simeq; Cancellarie, felicem tantarum re-
rum & testem & ministrum esse velit. Qvie-
scat super Te DEI spiritus, ut DEI res,
prævio & Duce Rege, quàm optimè in
terris agas. Sufficiat cumuletq; vires, ut
rerum maximarum molem indeflexâ cer-
vice sustineas. Faxit deniq; ut testatis-
sime in Regem Regnumq; fidei, ut Justicię
inter homines assertæ, ut benignè habitæ
Virtutis, ut profligatorum scelerum, ut
multis postremò meritis obligati Orbis
gloriosissima SIGNA spe nostrâ & famâ
superstite dignus CANCELLARIUS, di-
gnus EPISCOPUS sero in cœlum reditu
inferas; optatâ istic immortalitatis
lauru coronanda.

FINIS.





Biblioteka Jagiellońska



sidr0013637

